

**आकाशवाणी**

खबरां विजय बजाज कोला

पैहले खास-खास खबरां:-

1. प्रधानमंत्री नरेन्द्र मोदी अज्ज नमीं दिल्ली च म्यांमा दे राष्ट्रपति ऊ मिन आऊं लाइन हुंदे कन्नै दपक्खी गल्लबात करगंन।
2. 10 राज्यें दियें 24 राज्यसभा सीटें लेई दंऊ-दंऊ बरे च होने आले चुनांस लेई अधिसूचना अज्ज जारी कीती जाहग।
3. कृषि ते करसान कल्याण मंत्री शिवराज सिंह चौहान अज्ज मध्य प्रदेश दे रायसेन जिले थमां “खेत बचाओ” अभिजान दा शुभारम्भ करगंन।
4. पच्छिम बंगाल दे मुखमंत्री शुभेंदु अधिकारी अज्ज अपने मंत्रिमंडल दा विस्तार करडन। मंत्रिपरिषद च 35 नमैं मंत्रिएं गी शामिल कीता जाहग।
5. मन्नी-परमन्नी दी गायिका सुमन कल्याणपुर हुंदा 89 बरे दी उम्र च कल मुम्बई च काल होई गेआ।
6. IPL क्रिकेट च रॉयल चैलेन्जर्स बेंगलुरु ने कल अहमदाबाद दे नरेन्द्र मोदी स्टेडियम च खेड्ढे गेदे फाईनल च गुजरात टाईटन्स गी हराइयै लगातार दुई बारी IPL दा खिताब जिती लैता ऐ।

<><><><><><>

ते हून खबरा विस्तार कन्नै:-

<><><><><><>

## PM -Myanmar Prez

प्रधानमंत्री नरेन्द्र मोदी अज्ज नमीं दिल्ली च म्यामां दे राष्ट्रपति ऊ मिन आऊं लाईन हुंदे कन्नै दपकखी गल्लबात करडन। इस दरान दौने देशें बश्कार ऐतिहासिक ते सभ्यतागत सरबंधें गी होर मज़बूत करने पर चर्चा होग। कन्नै गै गल्लबात च सुरक्षा ते सम्पर्क सनें आपसी सैहयोग कन्नै जुड़े दे बक्ख-बक्ख मुद्दें पर बचार-बटांदरा होग। राष्ट्री सुरक्षा सलाहकार अजीत डोभाल होरें बी कल संजा नमीं दिल्ली च म्यांमा दे राष्ट्रपति हुंदे कन्नै मलाटी कीती। राष्ट्रपति आऊं लाईन जंदे शनिवारें 5एं दिनें दी भारत जातरा पर बिहार दे गया जी पुज्जे हे। उन्दे कन्नै इक उच्ची सतह दा डेलीगेशन बी आए दा ऐ। राष्ट्रपति दे तौर पर एह उन्दी पैहली भारत जातरा ऐ। राष्ट्रपति आऊं लाईन कल मुम्बई बी जागंन- जित्थे ओह उद्योग ते बपार जगत दे प्रतिनिधिं कन्नै मलाटी करडन।



## RS. Biennial Elections

10एं राज्यें दी 24 राज्यसभा सीटें दे द्विवार्षिक चुनां आस्तै अधिसूचना अज्ज जारी कीती जाहग। इस चुना दे तैहत आंध्र प्रदेश- गुजरात ते कर्नाटक दी 4-4 सीटें- राजस्थान ते मध्य प्रदेश दी 3-3 सीटें- झारखंड दिएं 2 सीटें ते मणिपुर-मेघालय- अरुणाचल प्रदेश ते मिजोरम दी 1-1 सीट लेई मतदान होग। साबका प्रधानमंत्री एच.डी. देवेगोड़ा- केन्द्रीय मंत्री ते BJP नेता जॉर्ज कुरियन ते रवनीत सिंह ते कांग्रेस अध्यक्ष मल्लिकार्जुन खर्गे उ'नें सदस्यें च शामिल न- जिंदा कार्यकाल इस महीने खत्म होआ रदा ऐ। एहदे इलावा महाराष्ट्र- तमिलनाडू ते ओडिशा च 1-1 राज्यसभा सीट दे चुनां

लेई अधिसूचना बी अज्ज गै जारी कीती जाहग। एह सीटां महाराष्ट्र दी उपमुख्यमंत्री सुनेत्रा पवार ते तमिलनाडू शा AIADMK दे सांसद सी.वी. शनमुगम हुंदे इस्तीफे करी खाली होइयां हियां। नामांकन अज्ज शा 8 जून तगर दाखल कीते जाई सकदे न। इस महीने दी 18 तरीक गी मतदान होग ते वोटें दी गिनतरी बी उसै दिन होग।

<><><><><><>

### **Maha LC Elections**

महाराष्ट्र च सत्ताधारी महायुति गठबंधन नै औने आहले विधान परिषद चुनाएं लेई 17एं सीटें दी बंड गी अखीरला रूप देई दिता ऐ। समझौते दे मुताबिक BJP 11 सीटें पर- शिव सेना 4 ते राष्ट्रवादी कांग्रेस पार्टी NCP 2 सीटें पर चुनां लडोग। विपक्षी महाविकास अघाड़ी ने पैहले गै 17एं चां 15एं सीटें आस्तै अपनी बंड दी घोषणा करी दिती ही- जेहदे च कांग्रेस 8 सीटें पर- शिव सेना - UBT 4 ते शरद पवार हुंदी अगुआई आहली NCP 3 सीटें पर चुनां लडौंग। बाकी नासिक ते नांदेड़ सीटें पर अजें विचार-विमर्श जारी ऐ। इस चुनां लेई नामांकन दाखिल करने दी अज्ज अखीरली तरीख ऐ। शिव सेना- UBT ने परभणी-हिंगोली निर्वाचन क्षेत्र शा डाक्टर विवेक नवंदर ते रायगढ़-रत्नागिरी सिंधुदुर्ग निर्वाचन क्षेत्र शा सुरेन्द्र उर्फ बाला माने गी मेदवार बनाया ऐ।

<><><><><><>

### **Khet Bachao**

राई-बाई ते करसानें दे कल्याण आले मैहकमे दे केन्द्री मंत्री शिवराज सिंह चौहान अज्ज मध्य प्रदेश दे रायसेन जिले थमां “खेत बचाओ” अभियान दा शुभारम्भ करडन। एह अभियान 30 जून तगर चलोग। अभियान दा मुख मकसद हैलें दा संतुलित ते

उचित इस्तेमाल बधाना- मौसम सरबंधी चुनौतियें मझाटे करसानें गी बेल्लै सिर सलाह देना ते पंचैती सतह पर जनभागीदारी गी जकीनी बनाना ऐ। श्री चौहान होरें सब्भनै राज्यें दे मुखमंत्रिणं गी इस अभियान च शामिल होने दी अपील कीती ऐ। उ'नै आखेआ ऐ जे किसान क्रेडिट कार्ड- प्रधानमंत्री किसान सम्मान निधि- फसल बीमा योजना ते मिटटी दे नरोएपन सरबंधी Soil Health कार्ड ज्नेही योजनाएं दा लाह करसानें धोड़ी पुजाने पर चेचा जोर दिता जा'रदा ऐ। कृषि मंत्री होरें इस अभियान गी लोकें दी शमूलियत दे राहें इक बड्डा जन-आंदोलन बनाने दा आहवान कीता ऐ।



### **WB-Cabinet**

पच्छम बंगाल दे मुखमंत्री शुभेन्दु अधिकारी अज्ज अपने मंत्रिमंडल दा विस्तार करडन। मंत्रिपरिषद च 35 नमैं मंत्रियें गी शामिल कीता जाहग। संगंध चुक्कने आला समारोह अज्ज दिनें 11 बजे लोक भवन च आयोजित होग। मुखमंत्री शुभेन्दु अधिकारी होरें जंदी 9 मई गी 5 कैबिनेट मंत्रिणं दी टीम दे कन्नै कार्यभार सांभेआ हा। मंत्रिमंडल विस्तार दे बाद राज्य सरकार च मंत्रिणं दी कुल गिनतरी बधियै 41 होई जाहग। एह गिनतरी 294 मैम्बरें आली पच्छम बंगाल विधानसभा लेई तय संवैधानिक हद्द दे अंदर होग।



### **Suman Kalyampur**

मन्नी-परमन्नी दी गायिका सुमन कल्याणपुर हुंदा कल मुम्बई च काल होई गोआ। ओह 89 बरे दी हिआं। सुमन होरें गी 1950 थमां 1970 दे दहके आले फिल्म संगीत च

हिंदी- मराठी ते केंई होरनें भारती भाषाएं च बड़ी शानदार गायिकी लेई जानेया जंदा ऐ। उन्दा जरम 28 जनवरी सन 1937 गी बंगलादेश दे ढाका च होआ हा। उ'नें 1950 दे दहाके दे मध्य च हिंदी फिल्में च कम्म शुरु कीता ते दिग्गज संगीतकारें ते गायकें- खासतौर पर मोहम्मद रफी हुंदे कन्नै सैकड़ां बद्दे गीत गाए। उन्दे किश सब्भनें शा मशहूर गीते च “आजकल तेरे मेरा प्यार के चर्चे”- “ना ना करते प्यार” ते “तुमने पुकारा और हम चले आए” शामिल न। उ'नें मराठी संगीत च बी महत्वपूर्ण जोगदान दिता। महाराष्ट्र दे गवर्नर जिष्णु देव वर्मा- मुखमंत्री देवेन्द्र फडणवीस- उपमुखमंत्री एकनाथ शिंदे ते सुनेत्रा पवार ते केन्द्री मंत्री नितिन गडकरी होरें बी सुमन कल्याणपुर हुंदा काल होई जाने पर सोग जताया ऐ।



### 8<sup>th</sup> Pay Commission JK Visit

8मां केन्द्री तन्खाह आयोग जम्मू-कश्मीर दे दौरे पर ऐ। आयोग आसेया अज्ज श्रीनगर दे शेरे-कश्मीर अंतराष्ट्रीय कन्वेंशन सेंटर च दिनै 11 बजे शा इक बजे धोड़ी केन्द्र शासत प्रदेश दी सरकार कन्नै गल्लबात करने लेई इक बैठक लाई जा रदी ऐ। मुख सचिव हुंदी अगुआई आली इक उच्ची सतह दी टीम इस बैठका च हिस्सा लैग ते आयोग अग्गे अपनी इक पेशकारी बी करोग। इस टीम च अतिरिक्त मुख सचिवें ते प्रधान सचिवें हुंदे इलावा GAD- कन्नू ते खज़ाना मैहकमें दे ऐहलकार बी शामिल होडन। 5 जून धोड़ी प्रदेश च रौहने दौरान कमिशन आसेआ बक्ख-बक्ख सरबंधत धड़े जियां सरकारी मलाज़में- संगठनें ते एसोसिएशनें वगैरा कन्नै सलाह-सूतर कीता जाहग।



## LG- Delegation

उपराज्यपाल मनोज सिन्ह होरें श्रीनगर च बक्ख-बक्ख प्रतिनिधिमंडलें कन्नै मलाटी कीती ते लोक हित ते विकास सरबन्धी मामलें गी सुनेआ। Radio Sharda दे संस्थापक ते MD Romesh Hangloo होरें बी उपराज्यपाल हुंदे कन्नै मलाटी कीती। एदे इलावा गुज्जर-बक्करवाल कर्मचारी एसोसिएशन नै चौधरी इमतेयाज कटारिया ते होरनें दुए लोकें बी उन्दे कन्नै मलाटी कीती। उपराज्यपाल होरें सब्बनें दिएं मंगें गी ध्यानै नै सुनेआ ते जायज मसलें दे हल दा भरोसा दोआया।



## Exfiltration Bid Foiled

सेना ते जम्मू-कश्मीर पुलस आस्सेआ चलाए गेदे इक सांझे अभियान च बारामूला जिले दे उड़ी सैक्टर च बन्ना टप्पियै उस पार जाने दी कोशिश गी नाकाम करी दिता गेआ ऐ। चिनार कोर ने इक सोशल मीडिया पोस्ट च दस्सेआ ऐ जे खास खुफिया जानकारी दे आधार पर सुरक्षाबलें इलाके च सांझे तौरा पर तपाशी अभियान रम्भेआ ते सोपोर थमां गाईड सनें दंऊ जनें गी फगड़ेआ ऐ। अधिकारिएं मुजब एह त्रौनें जनें-राष्ट्रविरोधी इरादें कन्नै उड़ी सैक्टर थमां बन्ने पार जाने दी कोशिश करा'रदे हे। सेना दी चिनार कोर नै पुलस दे सैहयोग कन्नै एह अभियान चलाया। मामले दी अगड़ी तफतीश जारी ऐ। तोंआई बारामूला जिले दे उड़ी सैक्टर च गै सेना नै पाकिस्तान दे गैर-कनूनी कब्जे आहले जम्मू-कश्मीर दे रौहने आहलें इक घुसपैठियें गी फगड़ेआ ऐ। अधिकारिएं मुजब- चौक्कने चिनार वारियर्स ने उस आदमी गी उसलै रोकी लैता-जिसलै ओह कब्जा रेखा गी पार करिए भारतीय इलाके च दाखल होने दी कोशिश

करा'रदा हा। मगरा इस घुसपैटियें गी अग्गे दी कनूनी कारवाई लेई पुलस गी सोंपी  
दिता गेआ।



## Census

मरदमशुमी दे मुख चरण दी शुरुआत अज्जै थमां होई गई ऐ। इस गेड़ च नियुक्त  
मतगणना अधिकारी ते एन्यूमेरेटर फिल्ड च जाइयै घर-घर सर्वेक्षण करडन। आपू  
अपने ब्योरे ऑनलाईन दर्ज करने आहला चरण मुक्की गेआ ऐ। हुन इस चरण च  
अधिकारी घर-घर जाइयै आंकड़े किट्ठे करडन। सरबंधी अफसरें लोकें गी अपील कीती  
ऐ जे ओह इनें लोकें दा सहयोग करन तां जे एह प्रक्रिया सुचारु ढंगे नै सम्पन्न होई  
सकै ते स्टीक ते सेई जानकारी हासल होई सकै।



## IPL –Final

आई.पी.एल. क्रिकेट च रॉयल चैलेन्जर्स बेंगलुरु ने कल अहमदाबाद दे नरेन्द्र मोदी  
स्टेडियम च खेड्ठे गेदे फाईनल मुकाबले च गुजरात टाईटन्स गी 5 विकेटें कन्ने  
हराइयै लगातार दुई बारी खिताब जिती लैता। पैहले बल्लेबाजी करदे होई गुजरात  
टाईटन्स ने तय 20एं ओवरें च 8 विकटां मुहाइयै 155 रन्ज बनाए- जेहदे परते च  
RCB ने 18एं ओवरें च गै जित हासल करी लैती। RCB दी इस जित च विराट कोहली  
हुंदी बड़ी बड्डी भूमिका रेही- जिनें छडी 42 गेंदें च नाबाद 75एं रन्जें दी पारी खेड्ठी।  
BCCI दे अध्यक्ष मिथुन मन्हास ते BCCI दे सचिव देवजीत सैकिया होरें बेंगलुरु दे  
कप्तान रजत पाटीदार गी IPL 2026 दी ट्रॉफी भेंट कीती।

